



Sabtu, 24 Juli 2021

Ogen: Ulangan 8:3



Kata Tuhan Penentu Arah



Teptep agama nuriken kerna Dibata alu cara ras penandaina. Janah kalak si tek man Dibata si isembahna e nembahsa rikut ras penandaina e. Amin megati la ka sitik kalak si erkiniteken e terjeng eragama saja tapi labo payo penandandaina kerna penentu arah, entah kompas enda megati si begi bas kegiatan pramuka tupung ia erdalan mencari jejak arah kerangen. Bagepe tupung kapal erlayar ku sada pulau entah pesawat si lepas landas. Kompas e perlu kal tangkas man bana si jadi ikuten gelah la papak, seh kempak tujun alu mejuah-juah. Penentu arah i bas kita eme Kata Dibata.

I bas ndalani kegeluhen enda megati jadi si la bagi ukurta ras si gejam tempa Dibata e ndauh sirang ras kita. Bagi perdalanen bangsa Israel i padang gurun empat puluh tahun dekahna, i je melala ia ngenanami kiniseran ras perbeben. Kiniseran e jadi guna nguji Israel entah tetap setia dengen patuh ndalanken kata Tuhan entah lahang. Kata Tuhan jadi penentu arah geluhna entah kata pusuhna jine. Ipelepas Tuhan bangsa e kelihen, kenca e ipenusurNa manna si lenga pernah ipanna ras ipan nini-ninina. Ilakoken Dibata bage guna ngajar Israel maka manusia nggeluh labo arah pangan saja tapi manusia nggeluh arah kasa kai si ikataken Dibata.

Banci saja i bas ndalani kegeluhen enda, kita pe ipelepas Tuhan ndalanisa si sada. Tempa la iperditekenNa, seh maka kiniseran sikerajangennta si erbahansa latih si akap. IpelepasNa kita si sada guna nguji kita, tupung bas kiniseran e tetap nge kita erdalan i bas Kata Tuhan entah mis putus asa dengen jungut-jungut? Ingetlah maka teptep kejadi si seh man banta susah entah senang gia, e kerina cara Tuhan guna mabai kita gelah ersada ras IA. Guna nehi tujunNa e sibahanlah Kata Tuhan penentu arah geluhta.